

[Augsburg], 25. November 1556

An Johannes Oporinus

UB Basel, Fr. Gr. I 11, fol. 204r-v.

Steinmann Nr. 696.

Lit.: Husner S. 150.

S. Quantae sint occupationes tuae ex eo conijcio, quod tibi non vacauit inspicere diligentius fasciculos a me tibi missos: in quibus omnia ea fuerunt, quae ad illum autorem pertinent praefatione excepta et annotationib[us]. Si quid verò deest, quod non puto, aut tabellarij resoluto fasciculo aliquid subtraxerunt, aut tu quae in fine 2. tomī sunt adiecta, non vidisti, aut (vt et te ipsum et amicos beare soles) ea diligentia assuerasti, vt reperire nequeas. Vtut sit, a me nihil petito. nihil enim habeo, nisi me impedire volueris, quo minus ἐν τοῖς χωνιάτου παραλειπομένοις pergam, in quibus vltra vires iam elaboro, et efficere vt cum summa molestia ac potius singulari calamitate, Cramben istam acerbissimam, atque vtinam non pestiferam etiam centies deuorem. Quaerito, inuenies, aut tabellarios accusato, qui mala fide munus suum obierint. Quod ex eo conijcere poteris, si fasciculi, quos ego diligenter constrinxi, resoluti fuerunt. Sed persuasum habeo te habere omnia. Mittam si per D. Antonium licebit, et veredarij festinatio non obstiterit, praefationem Zonarae, et annotationes, et carmina quaedam mea et Xylandri, quae in fine aut principio operis, sed in fine commodius videtur, adiungantur. Quibus acceptis, nihil tibi rei mecum erit. Tuus est Zonaras, tu eum ornato et arbitratu tuo tractato. Tractabis autem pro fide et diligentia tua, et vt spero, apto certè quidem, cum luculento tuo lucro distrahes.

His scriptis accessi D. Antonium. praefationem, annotationes, carmina, obtuli. Tabellarius cras se abiturum profitetur. Mittam illa quoque, si potero. Sin minus nunc, operam dabo, vt intra mensem accipias. Quae impressa sunt, tuo commodo huc mittito, vt patroni animum oblectes atque excites. Xylander propediem ad te mittet τὴν ψελλοῦ σύνοψιν τῶν μαθημάτων graecolatinam cum annotationibus eruditis. Fac quaeso παρέργως imprimas quamprimum. Id e re tua et autoris futurum confido. Est enim opusculum, quod in omnes scholas, si ludimagistri sapient, recipietur. Vale. D. Carino, si apud vos est, salutem. 25 Nouembr[is] Anno 1556.

Hiero[nymus] Wolfius.

Annotationum 4 terniones mitto. Praefatio nondum lecta est a D. Antonio, nec carmina. Metuo valde τὰς τῶν συμβουλευόντων τ' ἀνδρὶ διαβολὰς, ne bono studio malam gratiam ineam. φεῦ τῆς δουλείας καὶ πενίας, οἵα ἐργάζονται ἡμᾶς κακά; Vale.